

ՀԱՅԿԱԿԱՆ ՆԱԽԱՐԱՐԱԿԱՆ ՏՈՂՄԱՆՎԱՆ ԵԶԱԿԻ ՀԻՇԱՏԱԿՈՒԹՅՈՒՆ
ԲՅՈՒԶԱՆԴԱԿԱՆ ԱՂԲՅՈՒՐՆԵՐՈՒՄ

Պատմ. գիտ. դոկտոր Հ. Մ. ԲԱՐԹԵԿՅԱՆ

Ինչպես հայտնի է, Արևելա-Հռոմեական կայսրության և սասանյան Իրանի միջև Հայաստանի առաջին բաժանմամբ (387 թ.) Արշակունիների տերության շուրջ մեկ հինգերորդ մասն անցավ կայսրությանը: Սեփական պետականությունը կորցրած հայ ազնվականությունն սկսեց ծառայել հայրենիքը ներվաճողների պետական մարմիններում և բանակում: Դա առաջին հերթին վերաբերում էր կայսրության սահմաններում գտնվող կամ Հայաստանի պարսկական մասից կայսրության մասն անցած կամ անցնող ազնվականությանը. եթե պետք էր զրադաշտական Իրանի և քրիստոնյա կայսրության միջև ընտրություն կատարել, բնական է, նախապատվությունը պիտի տրվեր Հռոմեական (փոքր անց՝ Բյուզանդական) կայսրությանը:

Հայ ազնվականության հոսքը բյուզանդական բանակ և պետական ապարատ ավելի մեծ ծավալ ստացավ Հայաստանի երկրորդ բաժանումից (591 թ.) հետո և հատկապես՝ արաբական տիրապետության ժամանակաշրջանում: Պատահական չէ, որ մեզ հետաքրքրող ժամանակաշրջանում (IX—X դդ.) հայերը բյուզանդական բանակում և կայսրության ղեկավար մարմիններում, մոտավոր հաշվումներով, կազմում էին 25 տոկոս, եթե ոչ ավելի¹:

Ազնվականություն ասելով մենք նախ և առաջ նկատի ունենք հայկական նախարարական ընտանիքները: Գլխավորապես նրանց ներկայացուցիչներն էին Բյուզանդական կայսրության մեջ գրավում բարձր դիրքեր: Ն. Ադոնցի ասելով՝ «բոլոր այն հայերը, որոնք դերակատարներ են հանդիսանում բյուզանդական պատմության մեջ, գրեթե բացառապես պատկանում էին հայ ազնվականությանը»²: Բայց բանն այն է, որ Հայաստանում քաջ հայտնի նախարարական ընտանիքները՝ Մամիկոնյանները, Սյունիները, Կամսարականները, Բագրատունիները, Արծրունիները, Գնունիները և շատ ուրիշներ բյուզանդական աղբյուրներում հանվան են հիշատակված: Այդ առթիվ Ն. Ադոնցը իրավացիորեն գրում է. «Բյուզանդական հայերի տոհմական ծագումը զրգար է որոշել հաստատապես, եթե օգնության չեն գալիս հայ աղբյուրները զրական ցուցումով»³: Ուսումնասիրողները աշխատում են որոշել Բյուզանդիայում աչքի ընկած հայ գործիչների տոհմանունը՝ ելակետ ունենալով նաև այն հանգամանքը, որ «նախարարական տները տոհմական անուններ ունեին մի հայտնի չափով յուրահատուկ, որոնց միջոցով կարելի է երբեմն որոշել, թե ով ո՞ր տոհմին էր պատկանում: Սակայն հաճախ անունները փոխանցվում էին ամուսնության հետ, որով ավելի դժվարանում է օգտվել անունների ուղեցույցից»⁴: Այստեղ, հարկավ, խոսքը չի վերաբերում այն ընտանիքներին, որոնք առաջացան Բյուզանդական կայսրության մեջ (Կուրկուասներ, Փոկասներ, Սկլերոսներ, Կեկավմենոսներ և այլն), որոնք ազնվական դասից էին, բայց մեր հասկացողությամբ ոչ նախարարական:

Բյուզանդական կայսրության մեջ բարձր դիրքերի հասած հայերի նախա-ըրարական ո՞ր տոհմին պատկանելու ուղղությամբ հայագետներն ու բյուզան-

¹ C. Toumanoff. Caucasia and Byzantium.—Traditio. t. 27, 1971, p. 131.

² Ն. Ադոնց. Պատմական ուսումնասիրություններ. Պարիս, 1948, էջ 495:

³ Նույն տեղում, էջ 486:

⁴ Նույն տեղում:

գաղտնիները բավական աշխատանք են կատարել ղեկոս Մ. Չամչյանից սկսած: Այստեղ կարելի է նշել Կ. Տեր-Սահակյանին⁵: Բայց անուրանալի է, որ հիմնական գործը կատարել է ն. Ադոնցը՝ իր բաղմաթիվ գիտական աշխատություններում⁶: Նա, խոսելով հայ նախարարական ընտանիքների հատկապես IX դարում Բյուզանդիայում խաղաղած դերի մասին, առաջին հերթին նշում է Մամիկոնյաններին⁷, թեև, ինչպես ասացինք, բյուզանդական և ոչ մի աղբյուրում Մամիկոնյան տոհմանունը հանվան հիշատակված չէ: Չեն հիշված և Արծրունիները, թեև տարբեր կովանների հիման վրա ուսումնասիրողները, այդ թվում և ն. Ադոնցը, ցույց են տալիս Արծրունիների տոհմին պատկանող բյուզանդական մի շարք գործիչների, այդ թվում և Լևոն V Հայկազն կայսերը (813—820 թթ.)⁸:

Հետազոտողները ոչ մի խոսք չեն ասել Գնունյաց նախարարական ընտանիքին պատկանող բյուզանդական հայ գործիչների մասին⁹, հասկանալի է, որովհետև այդ մասին բյուզանդական աղբյուրներում ոչ մի ուղղակի տվյալ հայտնի չէր: Հայկական աղբյուրների ուղղակի վկայությունների կամ կողմնակի տվյալների հիման վրա ցույց է տրված, որ Հերակլիոս կայսեր ժամանակ (610—641 թթ.) 628—635 թթ. Հայաստանում գտնվող բյուզանդական զորքերի հրամանատարն էր իշխան Մովսես Գնունին¹⁰: Նրան ժամանակակից էր և Վարազ Գնել Գնունին¹¹: Մի այլ Մովսես (Գնունի), Օպսիկիոն բանակաթևի գորավարը, մասնակցեց Կոստաս II կայսեր (642—668 թթ.) սպանությանը Սիկիլիայի Սիրակուսա քաղաքում, բանակի կողմից կայսր հռչակվեց, բայց կայսեր որդի Կոստանդին IV-ի կողմից ձերբակալվելով, 669 թ. մահապատժի ենթարկվեց¹²:

Հայկական աղբյուրները թույլ չեն տալիս VII դարից հետո Բյուզանդիայում գործած որևէ հայ ազնվականի Գնունիների տոհմին պատկանելու հարց դնել: Կարելի է միայն նշել, որ Կ. Թումանովի և թագրություններ, վերը հիշված Լևոն V կայսրը Գնունիներին էր պատկանում¹³:

Բայց կարո՞ղ էին Գնունիներ լինել Բյուզանդիայում ինչպես նախորդ, այնպես էլ հետագա, հատկապես IX—X դդ.: Այս ենթադրությունը հաստատվում է և՛ անուղղակի, և՛ ուղղակի տվյալներով: Հայտնի է, օրինակ, որ ղեկոս Հայաստանի առաջին բաժանումից հետո Արշակ III-ի հետ կայսրություն զնաց իշխան Ասատ Գնունին (սկսած յաղգէն Գնունեաց), որի պատճառով Հայաս-

5 Կ. Տեր-Սահակյան. Հայ կայսրը Բյուզանդիոնի. հ. Ա—Բ, Վենետիկ, 1905:

6 Ն. Ադոնց. Պատմական ուսումնասիրություններ: Ն ու չ ն ի՝ Études Arméno-Byzantines. Lisbonne, 1965:

7 Ն. Ադոնց. Վասիլ Հայազն (Մեծագործ կայսր, 867—886).—Պատմական ուսումնասիրություններ, էջ 496: Տե՛ս նաև Հ. Բարթիկյան. Մամիկոնյան (°) սուրբ Մարիամ նորավկայի (+902—903 թթ.) բյուզանդական վարքը.—«Էջմիածին», 1975, № ԺԲ, 1976, № Ա, Բ:

8 Տե՛ս Մ. Չամչյան. Պատմություն հայոց. հ. Բ, Վենետիկ, 1785, էջ 432: Նաև Կ. Տեր-Սահակյան. Հայ կայսրը Բյուզանդիոնի. հ. Ա, էջ 155, 327 (Տեր-Սահակյանը թեև Լևոն V-ին Արծրունի է համարում, սակայն նրա հիմնավորումը քննադատության չի դիմանում): Գիտական բացատրություններ տե՛ս. N. Adontz. Sur l'origine de Léon V, empereur de Byzance.—Études Arméno-Byzantines, p. 46:

9 Դնունյաց նախարարական տոհմի մասին մանրամասն տե՛ս Հ. Ոսկյան. Գնունյաց և Ռշտունյաց նախարարությունները. Վիեննա, 1952:

10 Տե՛ս Պատմություն Սերգեյի, աշխատասիրությամբ Գ. Վ. Արզարյանի. Երևան, 1979, էջ 131—133: Նաև՝ Օտար աղբյուրները Հայաստանի և հայերի մասին, 13. Բյուզանդական աղբյուրներ, զիրք Դ. Թեոփանես Խոստովանող, Թարգմանություն բնագրից, առաջաբան և ծանոթագրություններ Հրաչ Բարթիկյանի. Երևան, 1983, էջ 35:

11 Պատմություն Սերգեյի, էջ 133:

12 Թեոփանես Խոստովանող, էջ 63—64: Պատմություն Սերգեյի, էջ 131:

13 C. Toumanoff. Studies in Christian Caucasian history. Georgetown, 1963, p. 200, n. 228, p. 205; Idem. Caucasia and Byzantium, p. 135:

այանի պարսկական մասում գտնվող իր ողջ ունեցվածքը պարսից արքա Շապուհի հրամանով բռնագրավվեց¹⁴։ Հայտնի է նաև, որ Ավարայրի ճակատամարտի նախօրեին վերոհիշյալ Ատատ Գնունու թոռը, «ոմն ի մեծ նախարարացն ի տոհմէն Գնունեաց Ատում», նույնպես գնաց Բյուզանդիոն¹⁵։ Նա, վերադառնալով Հայաստան, մասնակցեց Ավարայրի ճակատամարտին։

Գնունիների նոր հոսանքը դեպի Բյուզանդիա, ամենայն հավանականությամբ, տեղի ունեցավ 774—775 թթ. արաբների դեմ հայոց ապստամբության ճնշումից հետո, երբ Գնունիները Ադիոպլիտից գաղթեցին Տալթ¹⁶, Բյուզանդական կայսրությանը սահմանակից մի նահանգ, որի կապերը Բյուզանդիայի հետ ավելի սերտ էին¹⁷։ Վարդան պատմիչի ասելով բոլոր Գնունիները տեղափոխվեցին Տալթ¹⁸, թեև հայտնի է, որ իրենց հայրենիքում IX և X դդ. դեռևս հիշվում են Գնունյաց տոհմի բազմաթիվ անվանի ներկայացուցիչներ¹⁹։ Կ. Թումանյանը կարծիքով Գնունիները Տալթի վրայով անցան Բյուզանդական կայսրություն և նրանցից մեկն էր կայսր Լևոն V Հայկազնը²⁰, որը, ինչպես տեսանք, Ն. Ալոնցի համոզմամբ, պատկանում էր Արծրունիներին։

Պատմության ասպարեզից ելք հեռացան Գնունիները։ Այդ առթիվ Հ. Ոսկյանը գրում է. «Ժ դարուն մեջ գուցե պատմության բեմեն կհեռանան Գնունիները»²¹։ Կ. Թումանյանը նշում է որոշակի թվական. «Գնունիների տոհմը վերջին անգամ հիշվում է շուրջ 914 թ.»²²։

Այժմ անդրադառնանք մինչև օրս գիտությանը անհայտ մնացած, Գնունյաց տոհմին պատկանող մի իշխանի հանվան հիշատակությանը բյուզանդական աղբյուրներում, իշխան, որ Բյուզանդական կայսրության մեջ Լևոն VI-ի թագավորության ժամանակ (886—912 թթ.) շատ բարձր դիրքի էր հասել։ Նա այնքան հայտնի անձնավորություն էր, որ հիշատակվում է ժամանակակից գրեթե բոլոր բյուզանդական հեղինակների կողմից։ Նրա՝ Գնունյաց տոհմին պատկանելու հանգամանքի ի հայտ բերելը, ինչպես կտեսնենք ստորև, հնարավորություն կտա որոնելու և գտնելու Բյուզանդական կայսրության մեջ կարևոր դեր խաղացած մի շարք այլ նշանավոր գործիչների, որոնց ոչ միայն Գնունի, այլև առհասարակ հայազգի լինելու մասին բյուզանդագետները չէին էլ կոհհուսում։

Ասենք այստեղ, որ հայերը Բյուզանդական կայսրության պետական, վարչական և ռազմական մարմիններում ամենաբարձր դիրքերի հասան IX դարից սկսած։ 813-ից 820 թ. կայսերական գալիսոնը գտնվում էր Լևոն V-ի ձեռքում։ Նրանից հետո բյուզանդական գահի վրա ենք տեսնում Թեոդորա կայսրուհուն (842—856 թթ.), Ն. Ալոնցի համոզմամբ՝ Մամիկոնյան, և Թեոդորայի ու կայսր Թեոփիլոսի որդի Միքայել III-ին (842—867 թթ.)։ Վերջինիս թագավորության օրոք փաստական իշխանությունը գտնվում էր Թեոդորայի եղբոր՝ Միքայել III-ի

¹⁴ Մովսիսի Խորենացույ Պատմութիւն Հայոց. Տիգրիս, 1913, էջ 312։

¹⁵ Եղիշէի Վասն Վարդանայ և հայոց պատերազմին։ Ի լոյս ածեալ բաղդատութեամբ ձեռագրաց, աշխատութեամբ Ե. Տէր-Մինասեան, Երևան, 1957, էջ 71։ Մի այլ տեղում (էջ 133)՝ «նախարար մի որում անունն էր Ատում՝ յազգէն Գնունեաց»։ տե՛ս և էջ 193։

¹⁶ Հաւաքումն պատմութեան վարդանայ վարդապետի լուսաբանեալ. Վենետիկ, 1862, էջ 77։

¹⁷ Հմմտ. C. Toumanoff. Studies in Christian Caucasian history, p. 200, n. 228, p. 205.

¹⁸ Հաւաքումն պատմութեան, էջ 77։ Հմմտ. A. Тер-Гевондян. Армения и Арабский халифат. Ереван, 1977, с. 117, 125.

¹⁹ Թովմայի վարդապետի Արծրունույ Պատմութիւն տանն Արծրունեաց. Ս. Պետերբուրգ, 1887, էջ 146։ Նաև՝ Յովհաննու կաթողիկոսի Դրասխանակերտեցույ Պատմութիւն հայոց. Թիֆլիս, 1912, էջ 252։ Հմմտ. N. Adontz. Ashot Erkat' ou de Fer, roi d'Arménie de 913 a 929.—Etudes Arméno-Byzantines, p. 270.

²⁰ C. Toumanoff. Studies, p. 205.

²¹ Հ. Ոսկյան. նշվ. աշխ., էջ 50։

²² C. Toumanoff. Studies, p. 205.

մորեղբայր, կեսար Վարդի ձեռքում, որ կայսրից հետո պետության մեջ առաջին դեմքն էր: Միբայել III-ին հաջորդեց մի այլ նշանավոր հայ՝ Վասիլ I-ը (867—886 թթ.), որ դարձավ Մակեդոնական (ըստ Հ. Գեղեցիկի՝ Հայկական) հարստության հիմնադիրը: Վերոհիշյալների իշխանության օրոք հայերի դերը կայսրության կյանքի այլևայլ բնագավառներում հսկայական էր: Վիճակը տարբեր չէր և Վասիլի որդի Լևոն VI-ի (886—912 թթ.) ժամանակ: Նրա օրոք արքունիքում ամենաբարձր դիրքը զբաղեց Ստրիանոս Զաուցեսը, որ կայսր Լևոն VI-ի կողմից ստացավ մագիստրոսի բարձր պատվաստիճանը և դրոմոսի լոգոթետի պաշտոնը²³: Գիտության մեջ Ստրիանոս Զաուցեսը իրավամբ համարվում է «կայսերական քաղաքականության գործնական ղեկավարը»²⁴:

Ինչ ազդի էր պատկանում Ստրիանոս Զաուցեսը: Այդ մասին ուղղակի վկայում է եվթիմիոս պատրիարքի (906—911 թթ.) անանուն կենսագիրը, ղեկավարին ժամանակակից մի հեղինակ: Նա գրում է. «Ստրիանոսը, որի հայկական մականունն էր Զաուցես, մակեդոնացի էր, ծագումով հայ, ինչպես և ինքը [կայսրը]»²⁵, այսինքն Վասիլ I-ը:

Ստրիանոս Զաուցեսի դուստր Զոյեն Լևոն VI-ի սիրուհին էր: Ստրիանոսը իր դստերը կնության տալով Լևոն VI-ին, դարձավ կայսեր աներհայրը: Լևոն VI-ն էլ հատուկ իր աներոջ համար կյանքի կոչեց «կայսերահայր» (ἐξαπτερογον) պատվաստիճանը²⁶: Զոյեն ևրկար շապրեց. Լևոն VI-ի հետ թագավորելով մեկ տարի և ութ ամիս, վախճանվեց 895 կամ 896 թ. նոյեմբերի 10-ին²⁷: Փոքր անց պալատում վախճանվեց և նրա հայր Ստրիանոս Զաուցեսը²⁸, Բյուզանդական կայսրության պատմության մեջ առաջին «կայսերահայրը»:

Ինչո՞ւ ենք այսպես հանգամանորեն խոսում Ստրիանոս Զաուցեսի և նրա դուստր Զոյեի մասին: Այն պարզ պատճառով, որ Զոյեն, նախքան կայսեր հետ ամուսնանալը, կինն էր ոմն Թեոդորոս պատրիկի: Սա էր Ստրիանոս Զաուցեսի առաջին փեսան: Թեոդորոս պատրիկին թունավորելուց հետո է, որ Լևոն VI-ը ամուսնացավ նրա կին Զոյեի հետ²⁹: Եթե նկատի ունենանք Ստրիանոս Զաուցեսի բարձրագույն դիրքը բյուզանդական արքունիքում, ապա դա վկայություն է այն մասին, որ հիշյալ Թեոդորոսը սովորական անձնավորու-

²³ Theophanes Continuatus, ex recognitione Imm. Bekkeri. Bonnae, 1838, p. 354; Ioannis Scylitzae Synopsis historiarum, editio princeps, recensuit Ioannes Thurn. Berolini et Novi Eboraci, 1973, p. 172.

²⁴ *Տէս* История Византии. Т. II, М., 1967, с. 179—180.

²⁵ P. Karlin-Hayter. Vita Euthymii, — Byzantion, t. XXV—XXVII (1955—1957), fasc. I, p. 10. *Հունարեն բնագրում*. «Σπουδαῖον οὖν τῷ καὶ Ἰωάννῃ κατὰ τὴν τῶν Ἀρμενίων διαλέκτῳ προσαγορευμένῳ, ὡς αὐτὸς Μακεδόνι ὄντι καὶ τοῦ γένους Ἀρμενίων, καὶ ὡς αὐτὸς... Պատրիարք եվթիմիոսի վարքի ուսերեն թարգմանության մեջ այս նախադասությունը այնքան էլ հստակ չէ. «Царь оставил опекуном Стиллиана, армянское имя которого было Зауца (он был армянином, родившимся в Македонии, подобно самому императору)» (տե՛ս Две византийские хроники X века. Псамафийская хроника, предисловие, перевод и комментарий А. П. Каждана, М., 1959, с. 28), բանդի ընդգծում է Վասիլ I-ի և Ստրիանոս Զաուցեսի ձեռնադրվելու նույնությունը, այնինչ վարքագիրը նկատի ունի նախ և առաջ այդ երկուսի ազգային պատկանելության նույնությունը:

²⁶ Theophanes Continuatus, p. 357: Նաև Ioannis Scylitzae Synopsis historiarum, p. 175: Բյուզանդական կայսրության պատմության մեջ երկրորդ կայսերահայր դարձավ նույնպես հայազգի Թոմանոս Լեկապենոսը, Կոստանդին VII Ծիրանածին կայսեր աները:

²⁷ Theophanes Continuatus, p. 361; Ioannis Scylitzae Synopsis historiarum, p. 179; P. Karlin-Hayter. La mort de Theophano (10—11—896 ou 895).—Byzantinische Zeitschrift, Bd. 62, 1969, S. 15.

²⁸ Theophanes Continuatus, p. 362.

²⁹ Եվթիմիոս պատրիարքի վարքագիրը Թեոդորոսի (ինչպես և Լևոն VI-ի նախորդ կին Թեոփանոսի) մահվան մեջ մեղադրում է Ստրիանոս Զաուցեսի դուստր Զոյեին (Две византийские хроники X века, с. 43), բայց ուսումնասիրողները դա հերքում են համարում (նույն տեղում, էջ 23):

թյուն չէր³⁰։ Նրա ստացած պատրիկի բարձր պատվաստիճանը դրա օգտին է խոսում։

Աղբյուրները տալիս են Թեոդորոսի մականուն-տոհմանունը։ Եվթիմիոս պատրիարքի վարքագիրը նրան անվանում է Թեոդորոս Գօսյօսյաձէշ (Գուգուանիատես)³¹, Թեոփանեսի Շարունակողը՝ Թեոդորոս Գօսյաձէշէշ (Գուհիացիցես)³², Գեորգ Վանականի Շարունակողը՝ Թեոդորոս Գօսյաձէշէշ (Գաուանիատես)³³, Հովհաննես Սկիւիցեսը՝ Թեոդորոս Գօսյաձէշէշ (Գուհիացիցես)³⁴։ Մինևույն տոհմական տարբերակների նման առատությունը աղբյուրներում (որ ոչ այլ ինչ է, քան գրչական աղավաղումներ) ընդգծում է հույն գրչի համար այդ տոհմական արտասովոր ու օտարահունչ լինելը։ Ասենք այստեղ, որ հունարենն — լէշ (—իցես) վերջածանցը փաղաքական է (համտ. Թեոփիլոս — Թեոփիլիցես, Նիկեփոր — Նիկեփորիցես, Նիկոլաս — Նիկոլիցես) և համապատասխանում է հայերեն «-իկ»-ին (համտ. Գրիգորիկ, Արքայիկ, Հովհաննեսիկ և այլն)։ Ասենք նաև, որ ձէշ (—ատես) — ն էլ է վերջածանց, որ համապատասխանում է հայերեն «-ացի»-ին, որ մեր համոզմամբ «-իցես»-ի հետագա «իմաստավորումն» է։

Արդ, եթե նկատի ունենանք այն փաստը, որ հիշյալ տոհմանունը բյուզանդական ոչ բոլոր աղբյուրներում է բերված — լէշ (—իկ) ածանցով, ապա մենք կարող ենք այն զանց առնել։ Այդ դեպքում ստացվում է, որ տոհմական գրությունն առավել ճիշտ ձևը պահպանել է Թեոփանեսի Շարունակողը՝ Գօսյաձէշ (Գուհիացի), որ հեշտությամբ կարելի է ուղղել՝ Գ(ս)յօսյաձէշ — Գ[ն]ունիաց (հայերենում գրվում է Գնունեաց, բայց արտասանվում է Գնունիաց։ Դեռ ավելին. Նդիշեի երկի Մատենադարանի № 1482 ձեռագրում «ի տոհմէն Գնունեաց»-ի փոխարեն գրված է «ի տոհմէն Գունեաց»³⁵, այսինքն թույլ է տրված նույն սխալը, ինչ Թեոփանեսի Շարունակողի մոտ։ Եթե, հարկավ, դա երկուսի համար էլ գրչական սխալ համարենք, և ոչ, համենայն դեպս հույնի կողմից, իր համար ղեկավարահունչ այդ տոհմական արտասանությունը «հեշտացնելու» փորձ)։ Այսպիսով ստանում ենք «Թեոդորոս Գնունեաց»։

Ելնելով ասվածից, չպետք է անտեսել և այդ տոհմական եվթիմիոս պատրիարքի վարքագրի բերած տարբերակը՝ Գօսյօսյաձէշ (Գուգուանիատես)։ Փոքր սրբագրություններ այն դառնում է Գօսյօսյաձէշ (Գունունիատես) (ΓΟΥ-ΖΟΥΝΙΑΤΗΣ—ΓΟΥΝΟΥΝΙΑΤΗΣ)։ Ինչպես հայտնի է, հունարենում չկա «ը» գաղտնավանկը, որ հայերենում բառամիջում արտասանվում է, բայց չի գրվում։ Հունարենում այդ «ը»-ին հաճախ փոխարինում է որևէ ձայնավոր (համտ. Վիսկացի — ΒΙΣΚΑΤΖΙ — Վիսկացի³⁶, Գլրլակ՝ Γυλρλως — Գլրակիոս³⁷)։ Տվյալ դեպքում դրա փոխարեն օգտագործվել է օս (ու) — ն և Գլրլունիատեսի փոխարեն ստացվել է Գօսյօսյաձէշ (Գունունիատես)։ Այդ երևույթը հաճախ է հանդիպում հայերեն հատուկ անունների հունարեն տառադարձու-

³⁰ Ստիլիանոս Չաուցեսը նախապես իր դստեր՝ Զոյեի ձեռքը առաջարկել էր հայազգի նըշանավոր զորավար, սխոլերի դոմեստիկոս (սպարապետ) Նիկեփոր Փոկաս Ավագին (Նիկեփոր 11 Փոկաս կայսեր պապին), որը սակայն հրաժարվեց, որպեսզի իր դեմ չգրգռի Աստ VI-ին (Theoph. Cont., p. 359)։

³¹ P. Karlin-Hayter. Vita S. Euthymii, p. 50.

³² Theophanes Continuatus, p. 357.

³³ In Theophanes Continuatus, p. 852.

³⁴ Ioannis Scylitzae Synopsis historiarum, p. 175.

³⁵ Նդիշե, էջ 71։

³⁶ H. Bartikian. La généalogie du Magistros Bagarat, catépan de l'Orient, et des Kékaumènos.—Revue des Études Arméniennes, t. II, 1965, p. 266.

³⁷ Տե՛ս Օտար աղբյուրները Հայաստանի և հայերի մասին, 5. Բյուզանդական աղբյուրներ, գիրք Ա. Պրոկոպիոս Կեսարացի, Թարգմանություն բնագրից, առաջաբան և ծանոթագրություններ Հրաչ Բարթիկյանի. Երևան, 1967, էջ 231։

խյան մեջ: Բաղմաթիւ դեպքերի կարելի է հանդիպել Ագաթանգեղոսի Պատմության հունարեն թարգմանության մեջ. Ռ[ը]շտունեաց աշխարհ՝ Բայաշտուն չօրս³⁸, իշխանն Ռ[ը]շտունեաց՝ քօն Բայաշտուն քօնօրչիչ³⁹, Արծ[ը]րունեաց Բայաշտուն⁴⁰, Ք[ը]շ-ի անցումը «ո»-ի հանդիպում է նաև հայոց լեզվում: Հենց Ագաթանգեղոսի Պատմության ձևագրերում կա և «Ռուշտունեաց» ընթերցումը⁴¹:

Ինչ վերաբերում է մեզ հետաքրքրող տոհմանվանը, ապա հունարենում «ը»-ն, ինչպես տեսանք, կարող է և «ի» տալ: Նույն Գ[ը]նունի տոհմանունը, բացի Գունունի ձևից, հանդիպում է նաև Գինունի ձևով: VII դարի վերջին հայերենից հունարեն թարգմանված հայ կաթողիկոսների և թագավորների մի ցուցակում Գնունի տոհմանունը տառադարձված է Կլոնուն (Կինունի)⁴², Չի բացառվում, որ տվյալ դեպքում մենք գործ ունենք միջնադարում այդ տոհմանունի հայոց մեծ տարածված ժողովրդական ստուգարանության հետ. «Գիտեմ և զԳնունիսդ զինի ունիս, որ զարծանի թագաւորին պատրաստէր զըմպլիսն. որ սքանչելի իմն դիպալ եղև ըստ զործոյն և անունն. քանզի պատրաստէր զըմպլիսն սրբայի յրնտիր և ի համեղ գինեաց, ունէր և կոշումն անուան Գինն»⁴³:

Արդ, հիշյալ տոհմանվան -ատես վերջածանցը հունարեն է և, ինչպես վերևում առիթ ունեցանք ցույց տալու, համապատասխանում է հայերեն -ացի (-եցի)-ին և եթե մի պահ անտեսենք այն, ստացվում է Բայաշտուն (Գունունի), այսինքն տոհմանվան ուղիղ ձևը: Ասվածը, հարկավ, շատ գայթակղեցուցիչ է, բայց այդուհանդերձ, մենք համոզված ենք, որ այդ -ատես-ը ոչ այլ ինչ է, քան հույն գրչի (կամ հեղինակի, ինչու չէ, գուցե և հենց տոհմանվան կրողի՝ Թեոդորոսի) կողմից Գնունեաց տոհմանվան — հայ ածանցի «հունականացումը» կամ հունարեն իմաստավորումը:

Պետք է նշել նաև, որ եթե հունարենում տվյալ տոհմանունը պահպանել է հայերեն -եաց վերջավորությունը, ուրեմն կարելի է ենթադրել, որ տվյալ Թեոդորոսը կամ նրա ընտանիքը շատ վաղուց չէ, որ անցել էր Բյուզանդիա: Հայկական աղբյուրներում Գնունի նախարարական ընտանիքին պատկանող ազնվականները հիշվում են ոչ միայն «Գնունի» ուղիղ ձևով, այլ հաճախ «Իշխան Գնունեաց», «Տէր Գնունեաց», «ի տանէն Գնունեաց», «յազգէն Գնունեաց» հոլովված ձևով: Թեոդորոսի տոհմանվան հետևա, ամենայն հավանականությամբ, նույն բանն է կատարվել՝ «Թեոդորոս [յազգէն] Գնունեաց» կամ «Թեոդորոս [ի տանէն] Գնունեաց»:

Այսպիսով, հայտնի դարձավ Վասիլ I-ի և Լևոն VI-ի թագավորության ժամանակ բյուզանդական արքունիքում փայլող հայազգի մեկ գործիչ և՛ Թեոդորոս Գնունեաց, ավելի շուտ՝ արիստոկրատական մի ընտանիք ևս, քանի որ Թեոդորոսն ունեցել է սերունդ, որ շարունակել է նրա լայն գործունեությունը Բյուզանդիայում: Հովհաննես Սկիլիցեսը 1015 (կամ 1016) թ. հիշում է զորավար Բօթրիչ Բօնիչիչ (var. Բօնիչիչ), որը մասնակցել է Վասիլ II-ի՝ Բուլղարիայի դեմ մղվող պատերազմին և ընկել մարտի դաշտում⁴⁴: Նրա տոհ-

³⁸ Agathangelus und die Akten Gregors von Armenien. Neu herausgegeben von P. de Lagard. Göttingen, 1887, S. 68.

³⁹ G. Garitte. Documents pour l'étude du livre d'Agathange, Città del Vaticano, 1945, p. 73.

⁴⁰ Agathangelus und die Akten Gregors von Armenien, S. 69.

⁴¹ Ագաթանգեղայ Պատմութիւն Հայոց. Տիգրս, 1909, § 795 (էջ 414, ծան.): Հմմտ. և այսօր Ս[ը]մբատ—Սումբատ, Մ[ը]կ[ը]րտիշ—Մուկուշ և այլն:

⁴² Տե՛ս G. Garitte. La Narratio de rebus Armeniae, Edition critique et commentaire, Louvain, 1952, p. 405, 435—436.

⁴³ Մովսէսի Խորենացու Պատմութիւն Հայոց. Տիգրս, 1913, Գիրք Բ, գլ. է, էջ 111:

⁴⁴ Ioannis Scylitzae Synopsis historiarum, p. 354.

մանունը՝ Գոնիցիատես, որ այլ ինչ է, քան Գնունեաց տոհմական մի տարբերակ ևս⁴⁵։ Այսպիսով, եթե Հ. Ոսկյանին հետևելով կարող ենք ասել, թե «Փ դարուն մեջ գուցե պատմության բեմեն կհեռանան Գնունիները», կարող ենք նկատի ունենալ միայն Հայաստանը։ Բյուզանդական կայսրության մեջ Գնունիները կան նաև XI դարում, գուցե և դրանից էլ հետո։

УНИКАЛЬНОЕ УПОМИНАНИЕ АРМЯНСКОГО НАХАРАРСКОГО РОДОВОГО ИМЕНИ В ВИЗАНТИЙСКИХ ИСТОЧНИКАХ

Доктор ист. наук Р. М. БАРТИКЯН

Резюме

После раздела Армении между Восточноримской (позже—Византийской) империей и Сасанидским Ираном (387 г.) представители армянских знатных родов стали служить в византийской администрации и армии. Приток армянской аристократии в Византию принял более широкие масштабы после захвата Армении арабами. По подсчетам специалистов, примерно четверть состава византийского господствующего класса в IX—X вв. составляли представители знати армянского происхождения. Несмотря на это, в византийских источниках ни один армянский феодальный род (Мамиконяны, Багратуни, Арцруни, Камсараканы, Гнуни и др.) не упомянут.

Исследование показало, что одна знаменитая армянская феодальная фамилия все же встречается в византийских источниках X—XI вв. Речь идет о фамилии патрикия Феодора, зятя знаменитого фаворита Льва VI (886—912) Стилнана Зауцы. Его армянское родовое имя, совершенно чуждое греческим переписчикам, варьируется в рукописях: *Гузуанит*, *Гузуни*[ат], *Гуниац*[иц], *Гауаниат*, *Гунуазит*; это не что иное, как армянская нахарарская фамилия *Гнуни* (*Гунуни*, род. падеж *Гуниац*, *Гунуниац*). Исходя из сказанного, нужно и упомянутого в историческом труде Иоанна Скилицы под 1015 (или 1016) годом видного военачальника византийской армии Георгия Гонициата считать принадлежащим к тому же армянскому роду Гнуни.

В арменоведении признано, что род Гнуни сошел с исторической сцены в начале X в. Если это и верно касательно коренной Армении, дело обстоит иначе в Византийской империи, где представители этого рода известны и в более позднее время.

⁴⁵ Ա. Պ. Կաթողանի՝ XI—XII դդ. Բյուզանդական կայսրության հայազգի ավագանուն ներգիրված դրբում (А. П. К а ж д а н. Армяне в составе господствующего класса Византийской империи. Ереван, 1975) Գնունիները, բնական է, բացակայում են, այդ թվում և այս Գեորգ Գոնիցիատեսը։